

Канон пред Озерянской иконой Пресвятой Богородицы

Память празднуем 30 октября (12 ноября)

Тропарь, глас 3-й

Твоего предстательства уверение и милосердия Твоего явление иконы Озерянская нам, Владычице, показася; пред неюже души наша в молитве изливаем и верою Тебе вопием: воззри, Милосердая, на люди Твоя, вся скорби наша и печали утоли, утешение благое в сердца наша низпосли и спасение вечное душам нашим, Пречистая, испроси.

Канон, глас 3-й

Песнь 1

Ирмос: Песнь новую поим, людие, от Девы Рождшемуся во спасение наше едино Сотворшему с Небесными земная, яко прославися.

Припев: Пресвятая Богородице, спаси нас.

Богородице Пречистая, молитву смиренных сердец наших прими, паче же Сама научи нас, о нихже подобает просити и имже словесы пети Тя, Пренепорочную.

Пресвятая Богородице, спаси нас.

Людие Божии сытости похвалы Твоей не имут, Богородице, но умилённым славословием чудес Твоих присно питающиеся, велие утешение тем приемлют.

Пресвятая Богородице, спаси нас.

Ангели Твою чистоту воспевают, Владычице; нам же, человеком, помози Твое заступление присно поминати и чудеса от святых иконы Твоей повести.

Слава: Житие трудолюбивое прождая, на делание изыде препростый муж, внезапно же изображение Божия Матере зрит, косою его разсеченное, и сие со благоговением в дом свой приносит.

И ныне: Еще спящу человеку тому святая икона Владычицы разсеченная чудесно срастется и паки на место явления своего пренесется, еже видевше, людие Божию Матерь прославиша. С ними и наши, о Владычице, молитвы примим милостивно.

Песнь 3

Ирмос: Лук сокрушил еси врагии и щиты стерл еси крепостию, Владыко Христе, утверждение наше, Свят еси, Господи.

Пресвятая Богородице, спаси нас.

Несомненные веры исполнен, иерей Феодор всеблагоговейно икону Владычицы в новосозданном поставляет храме, и множества людей тамо притекати абие навикова; днесь же святыня сия пред очесы нашими зрится и умиления сердца наша исполняет.

Пресвятая Богородице, спаси нас.

Не остави нас, Богородице, нечистыми страстьми влятися, не остави в беззаконных наших погибнути, но молящихся Тебе житие свое исправити научи и Твое милосердие воспети достойно.

Слава: Оному иерею Феодору Богородица наставница бысть; Ея бо ради чудотворнаго образа обитель иноков устрои и сам во Ангельстем образе житие свое скончавает. Потщимся убо, о братие, тояже иконы поклонницы, себе самех в волю Божию присно предавати.

И ныне: Человеков молитвы и Ангелов славословие, Владычице, приемлющи, и моего убогаго не отврати моления, скорбь души моя утоляющи, паче же терпение в скорбех присно мне подающи.

Господи, помилуй (*трижды*). Слава, и ныне:

Седален, глас 5-й

Молитв, яже о нас, присное устремление, и грешных прибежище несумненное, и праведнаго гнева Божия отклонение познахом Тя, Богородице Деве; убо и на нас долготерпение Твое простри, и грехом нашим прощение испроси, и во благих прошения наша исполни, Пречистая.

Песнь 4

Ирмос: Странна и неизреченна Рождества Твоего тайна! услышах слух Твой, и убояхся, и, веселяся, вопию Ти: силе Твоей слава, Человеколюбче.

Пресвятая Богородице, спаси нас.

Различных исцелений чудеса от новоявленных Твоей иконы, Владычице, абие во окрестных странах слышана быша и Святогорския пустыни настоятеля болящаго на обещание подвигоша, иже, здравие получив, ко храму Твоему пешешествует и обитель иноков со иереем Феодором тамо устроает.

Пресвятая Богородице, спаси нас.

Естество земных тварей от подобнаго себе раждается; тако и обитель Озерянская от Святогорския начало прият чудеса Твоя достойно воспевати. Ныне же обители Курьянская и Покровская сей блаженный жребий прияша; мы же, величая Тя, Твоему образу со умилением поклоняемся, Владычице.

Пресвятая Богородице, спаси нас.

Владычице Пречистая, елика просим днесь от Тебе прияти сия от чудотворных Твоей иконы нам подаждь, и немощное наше произволение утверди, и Небесных благ желание в сердца наша всели.

Слава: Оный муж явления иконы Твоей, Богородице, во время делания звания своего сподобися; тако бо Господь смиренныя возвышает. Убо и от нас помыслы гордыни и зависти отжени, Владычице, и вышняя почести будущия жизни желати нас научи, Пречистая.

И ныне: Нашему спасению буди, Богородице, ходатаица и наставница, но и телесныя нужды и болезни наша исцели; зане, маловерни и нетерпеливи суще, помыслы уныния в бедах наших вляемся и наипаче терпения дар у Бога просити требуем.

Песнь 5

Ирмос: На земли Невидимый явился еси и человеком волею сожил еси Непостижимый, и, к Тебе утренююще, воспеваем Тя, Человеколюбче.

Пресвятая Богородице, спаси нас.

Огнь веры в людех Твоих возжже Твоя, Богородице, икона; егда бо вскоре губительная язва на страну нашу найде, молящихся пред чудотворным образом Твоим всегда исцеляхуся. Мы же, тех правнучы суще, благодарную память о сем тепле сохраняем.

Пресвятая Богородице, спаси нас.

Сей убо губительней язве прешедшей, чрез сто и паче лет другая пределы Российския земли посети трикраты; ужасом же смятении людие к подножию святыни Божия Матере паки припадаху и, икону Владычицы во град Харьков приносяще, от недуга того исцеление приимаху.

Пресвятая Богородице, спаси нас.

Иже в бедах сущии человецы, ведите, яко близ вас избавление верное обретается, аще токмо с верою сие призывати будете, сие глаголюще: о Владычице, помози и прости нас грешных, о нас милосердовавши.

Слава: Вемы, Владычице, вемы, яко веры исполненная молитва Тобою не отщется; но сицевыя веры лености ради нашея не стяжахом, аще и стяжати возжелехом. Темже и вопием: веруем, Пречистая, помози нашему маловерию!

И ныне: Широкий путь жития зле возлюбихом, Богородице, к погибели сыны своя влекущий и веру их сокрушающий, но пред святою Твоею иконою предстояще, покаяние о сем приносим и помощи Твоея смиренно просим, во еже на путь спасения обратится.

Песнь 6

Ирмос: Селения Иона яже в преисподнем аде естественный образ быв, вопияше: возведи от тли живот мой, Человеколюбче.

Пресвятая Богородице, спаси нас.

Естественнаго исцеления отчаявся, увещанию же духовнаго отца своего повинуюся сухорукий некий муж ко иконе Владычицы пешим издалеча притече хождением; и молитва веры болящаго исцели, и бысть рука его здрава, душа же хваления Твоего, Богородице, исполнися.

Пресвятая Богородице, спаси нас.

Еже ко временному житию потребное в мале полезно есть, но паче сих о сухости сердец наших восплачем, о братие, и исцеления страстей наших просити потщимся, греховное житие свое окаявше и Горних даров тепле возжелевше.

Пресвятая Богородице, спаси нас.

Твоея милости сподобися хромый, во обитель Твою, Богородице, привезенный и пред святою иконою Твоею усердную вознесый молитву, иже абие исцеление от недуга своего прият и пеший в дом свой радостно возвратися.

Слава: Ядом страстей извращена ми душа, и ноге мой по пути спасения ходити не возмогут, аще не Твоим, Пречистая, представством благодатную обрящу помощь, во еже на путь правый устремити души моея шествие.

И ныне: Исполни ужаса видение иконы Твоея, о Владычице, бесную некую девицу, бэсу на хулы сию подвизающую; обаче вознесенное церквию моление, паче же Твоего представства сила, абие бэса от дэвы тоя изгна и здраву бывшую на славословие подвиге.

Господи, помилуй (*трижды*). Слава, и ныне:

Кондак, глас 5-й

Не отрини, о Милосердая Мати, слез и воздыханий наших, но прошения наша милостивно приими, пред иконою Твоею молящихся людей веру укрепи, умилением сердца их исполни и крест земного жития носить им помози; елика бо хочещи, можещи.

Икос

Егда Святых Владычицы нашей икона во град Харьков на кожедо лето приношашеся или паки во ближнюю обитель изношашеся, тогда града сего людие, ко проведению святыни устремляхуся, благодатным исполняхуся умилением и покаяние теплое о гресех своих приношаху. Но сицевое покаянное умиление и память чудес, от святыни нашей бываемых, присно в душах наших подобает хранить нам, о братие, и на святую Богородицы икону взирающим глаголати: крест земного жития носить нам помози, елика бо хочещи, можещи.

Песнь 7

Ирмос: Гордый мучитель, но детей бысть игралище, якоже бо персть, поправше седмеричный пламень, пояху: благословен еси, Господи, Боже отец наших.

Пресвятая Богородице, спаси нас.

Связаннаго мя страстей насильством паче бесных тоя девы окаяваю аз; тая бо неволей власти его предана бывши, муку принимаше, аз же волею бесовское исполняю хотение. Но, о Владычице, Твоего Сына волю творити научи мя.

Пресвятая Богородице, спаси нас.

Оградь, Владычице, мое помышление, да не хулою или злобою во власть демоном предам свою душу, но сию непрестанныя потщуся исполнити молитвы, глаголя: представством Матере Твоея от лукаваго избави мя, Господи.

Пресвятая Богородице, спаси нас.

Священною водою пред чудотворным Богородицы образом окроплен быв, исцелен бесный человек, иже прежде вся люди беснованными своими zelo устрашаше, по сих же со благоговением и тихостью души благодарение о чудеси Владычице принесет. С ним и нас, о Всеблагая, услыши молящихся Тебе.

Слава: Церковь, в нейже икона Твоя пребывает, Богородице, лечебница недугов телесных и душевных является, веры же учительница неверия явная обличительница.

И ныне: Аще тех человек исцеленных толикаго не имам упования и веры, но покаяния моего ради исцели, Всеблагая, души моея беснование, и тихость смиренномудрия подаждь моему сердцу.

Песнь 8

Ирмос: Вещественного огня пламень Невещественным увядиша Богозрими отроцы и пояху: благословите, вся дела Господня, Господа.

Пресвятая Богородице, спаси нас.

Язык человеческий не возможет изрещи, коликую души наша любовь и

умилѣние вмещают к Тебѣ, о Всеблагая, ниже бо словесы, ни пѣснями насытитися возмóгут, но сия слезами радости пред святынею Твоею восполняют.

Пресвятая Богородице, спаси нас.

Жены некия две ослѣпшия юныя дщери, от земныхъ врачей никоеяже пользы получившия, внезапно пред иконою Богородицы прозрѣша, и от того дне даже до старости здравы пребывающа, сию икону почитали знаемая увещаваху.

Пресвятая Богородице, спаси нас.

Евангелием Христовым обещанная верным чудеса видим зде умножающаяся; убо и жити евангельски потщимся, братие, да не прещение, Тиру и Сидону Христомъ предреченное, наши нечувственные постигнет души.

Слава: Един по единому приходят семо вернии, исцеления им бывшая от иконы Богородицы исповедающе и сию златом и самоцветным камением украшающе; темже и души наши златом добродетелей украсим, да милостей Пречистыя достойни явимся.

И ныне: Славу Божией Матери воздаваше исцеленная отроковица, уже смерть прияти имущая, но по внезапно от иконы сей исцелении память о чудеси до старости хранившая и вся драгоценныя рясны своя на ризу образа сего приложившая.

Песнь 9

Ирмос: Сладкою Пречистаго Твоего Рождества стрелою уязвлени, Чистая, Твоей достожеланней доброте дивящися, пѣснями Ангельскими достойно Тя яко Матерь Божию величаем.

Пресвятая Богородице, спаси нас.

Иже почитания Богородицы отпадшии, посрамитесь, еретицы, умиленное пение Той, от православныхъ возносимое, слышаше; паче же в чувство пришедше, к нашему сопричтитесь молению, да вкупе Чистую возвеличаем.

Пресвятая Богородице, спаси нас.

Святым Своим Апостолом обетоваше Спас, яко всяк, ближнему своему милость во имя ученика Его творяй, своея не погубит мзды. Сицевыя, о братие, сугубо сподобитесь, аще во имя Матере Господни в делах братолюбия подвизатися будете, моление Владычице присно приносяще.

Пресвятая Богородице, спаси нас.

Се роди земнии ублажают Тя, Владычице, якоже прорекла еси, и Тобою возносит смиренныя сердцем Христос и алчущия благ всяческих исполняет, богатящися же и гордыя посрамляет. Темже новый Израиль милости Твоя, человечеству дарованныя, воспоминает и Тя, Пречистая, величает.

Слава: Аз един, паче всех грешен сый, аще и чудесем Твоим, Богородице, умиляюся, но жития своего доднесь не исправих; обаче, якоже суху руку молящемуся исправила еси, сице иссохшую мою исцели душу, да Тя непрестанно величаю.

И ныне: Людѣй мольбы и славословия, пред чудотворным Твоим образом и на всяком месте возносимыя, благоутробно, Владычице, прими, и, узами Твоея любви души наша пророчески связавши, сия в Небесное привлецы Царство, и тамо Твоему лицу поклонитися сподоби.